



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim TAPAK 8

Maharashtra nung assembly election agishitsüla

WFI tekolakba Brij Bushan Sharan Singh-i kuli agütsüogo

VOL. XX NO. 210 (ADOK 210)

DIMAPUR

KÜPTOKNÜ (SATURDAY)

MONUPII (MAY) 13, 2023

₹ 5.00

## Manipur nung Kuki MLA temi state balaka meshir

Imphal, May 12, 2023

(Agencies): Manipur nung Kuki nung MLA 10-i parnok Manipur state nung balaka razüka aotsü atema shidi ka zülüogo.

"Ozü nübertemi Manipur kübok liyonga moutettsü" ta MLA temi züluba shidi nung shia lir.

"May 3, 2023 nung Manipur sorkari pusema Meitei nungeri tenemlen aliba Chin-Kuki-Mizo lisopurtem anema mapa inyakba ajanga state lemdangogo aser iba ajanga onok Manipur state nung balaka razüka aotsüsa kümogo" ta Kuki nung MLA 10-i ashi.

"Ozü nübertemi Manipur kübok liyonga moutettsü kechiyong MLA, minister, pastor, police aser civil ketdangsurtem, kecha masüba tetsurtem aser tanurtem dak-a teka sangshio. Iba dakji alia tekülem kitem, kiojen aser rongsen raksatsüogo. Anungji Meitei nung den alitsü denbo onok asüba tajungba" ta parnokisa metetdaksü.

"Ozü nübertemi shimtetba nübotem ama onoki nübertem asoshi noktaker aser parnoki aginüba ama Manipur state nung balaka razüka aotsü pusema nungiter. Onoki nübertem den tekaratiba nung inyaka aotsü atema asüngdangteptsü lemtetogo" ta MLA 10-i ashi.

"Manipur state sorkari onok kümzüka meyut anungji onoki India sorkar dang Constitution of India kübok ketdangsuba balaka meshir aser Manipur state den kidanger ama tiptema liyonga

onür" ta parnokisa ashi.

Iba shidi zülurtem rongnung BJP nung MLA 7, Kuki People's Alliance nung 2 aser Independent ka dena lir.

Parnok ya Haokholet Kipgen (IND), MLA, Saitu AC; Ngursanglur Sanate (BJP), MLA, Tipaimukh AC; Kimneo Haokip Hangshing (KPA), MLA, Saikul AC; Letpao Haokip (BJP), MLA, Tengnoupal AC; LM Khaute (BJP), MLA, Churachandpur AC; Letzamang Haokip (BJP), MLA, Henglep AC; Chinlunthang (KPA), MLA, Singngat AC; Paolienlal Haokip (BJP), MLA, Saikot AC; Nemcha Kipgen (BJP), MLA, Kangpokpi AC aser Vungjagin Valte (BJP), MLA, Thanion AC nung lir.

### Manipur sorkari 'internet services' shibanger

Manipur nung tensa azüoktsü atema state sorkari May 11 nü internet services shibangtsü tetuyuba agütsüogo.

Taruba anogo pungunü atema mobile data aser broadband services dena internet services shibangtsü ta state sorkari metetdaksü.

Manipur nung kin tulutem nung volunteers/lanurtemi ozüing alema inyaksangshiba osangtem angazükba sülen sorkari iba telemteba agiogo.

WhatsApp, Facebook, Instagram, Twitter amala social media sabangtem ajanga osang tiyazü aser olulutem prokshiba noktangtsü atema internet services shibanger ta sorkari metetdaksü.

## NSDMA-i Cyclone Mocha indang metetdaksür

Dimapur, May 12, 2023 (TYO):

Taruba anogo ishika tsüingda Cyclone Mocha-i Bay of Bengal tonga arutsü anungji nübertemi kümdanga alitsü metetdaksür ta Nagaland State Disaster Management Authority (NSDMA)-i ashi.

Iba yipru ajanga Nagaland nung balaka mekongshitsü saka taruba anogo ishika mopung tashii aontsü aser tzüinglu arutsü.

Honibar aser Deobar (May 13 & 14) anogotemtzüinglu tashii arutsü, ta NSDMA-i metetdaksüogo.

Cyclone Mocha ajanga tashimeiti aliba kiojentem, tsünusenbongtsü aser süngdongtem laodaktsütsü akok aser tesem kar nung anentsüh alutsü akok. Anungji nübertemi süngdong tulutem aser ayongküm anasa maotsü mepishir, ta NSDMA-isa ashi.

## Nagaland nung International Nurses Day 2023 mongogo



Commissioner & Secretary, Health and Family Welfare Department Y Kikheto Sema, IAS den School of Nursing ketdangsurtem aser TNAI, NHAK nurse tem külemi agiba noksa ka angur.

Dimapur, May 12, 2023 (TYO): Alima den külemi Nagaland nung Hokolbarnü International Nurses Day mongogo.

Florence Nightingale sor küm 201 buba ajungba bilemteta "Our Nurses. Our Future" omen nung ajemdaker iba benjung among.

Naga Hospital Authority Kohima (NHAK) nung ayonga agiba sentong nung Commissioner & Secretary, Health and Family Welfare Department, Y Kikheto Sema, IAS-i nurse tem nem tenüngsang agütsü.

Tayongzükba jenti ajuruaka nurse temi bendanga agüja meimchir tenzükba atema pelar ta pai ashi.

"Nurse temi shilem tajung agibaji Covid-19 wara mapang asenok dang nenshia sayuogo.

Nurse aser tanga health care workers medeni asenoki Covid-19 anema rara nung takok mengula" ta Kikheto Sema-i ashi.

"Asenok shirang balala nung kümzüka ajanga Tsüingrem sülenbo doctor tem ta asenoki züingshir, süra nurse tem ya kotak tenyartem ama züingshitsüla ta nibo bilemer, kechiyong parnoki doctor tem yarir" ta paisa ashi.

"Indian Public Health System (IPHS) ajanga Nagaland nung staff nurses 952 aser Auxiliary nurse midwife (ANM) 845 lir aser iba nung tebur staff nurse 21 dang lir" ta Commissioner & Secretary-isa metetdaksü.

"Global health workforce nung tetsür 70% lir anungji shiranger teburtem yaritsü atema

tebur nurse tem shimtsü nüngdaker aser talisa ibaji Intensive Care Units amala nung nüngdaker" ta paisa ashi.

"Nurse peria maliba mozü ki kaji tamendakdak tajung maliba ki ka ama lir" ta paisa shisem.

India sorkari School of Nursing ya nursing college ka ama ajungkettsü mulunga agizükogo anungji kobi melii Nagaland nung mezüngbuba Government Nursing College lapoktsü imlaa atar, ta Y Kikheto Sema-isa ashi.

"Nurse tajung ka asütsü atema 6Cs nüngdaker aser itemji Care, Compassion, Courage, Communication, Commitment, Competence lir. Nurse ka dak khuret koktetba shisatsü aser asayamenü alitsüla" ta paisa metetdaksü.

## Nagaland Reading Festival nung takoker nem senpet agütsü

Kohima, May 12, 2023 (TYO): Nisung kati kakat azüingba ajanga rongsenketzüng aser lokti tayongzükbatem kokteter ta School Education & SCERT Advisor Dr. Kekhrielhoulie Yhome-i ashi.

October nung November 2022 tashi Nagaland Reading Festival (NRF) agiba atema sempet agütsüba sentong nung "tesüiba mapang literacy ta asüba ya azüingtsü aser zülutsü metetba liasü saka tanübo emotional literacy, financial literacy, digital literacy amala aika lir" ta Advisor Yhome-i ashi.

Iba literary festival ya Naga nung kakat azüingtsü ajungmesotsü atema ayongzük aser maneni agiyonga aotsü ta pai ashi.

Nagaland nung Department of School Education-i wadang aika nung tangar memenep lir aser sorkar school temi quality education agütsütsü atema Samagra Shiksha ajanga akokba tashi teyari agütsür ta Advisor Yhome-i ashi.

Sorkar school ketdangsurtem aser tesayurtemi classroom nung kaketshirtem dang lenisüba sayutsüla ta paisa ashi.

Sorkar school tesayurtem ya qualified nisungtem lir aser

loktliba nung tangar memenepertem inyakba ya maangka ka ama bilema inyaksüla. Sorkar tesayurtemi tanurtem aser state tajungba nung renloksü atema yariteptsüla, ta paisa metetdaksü.

Iba sentong nung Advisor Yhome-i Directorate of School Education indang sentong asem-National Initiative for Proficiency in Reading with Understanding and Numeracy (NIPUN) Nagaland kübok Literacy & Numeracy Fest, Teachers Resource Package aser NIPUN App sayatsü.

"Kakat azüingtsüba indang maparen ya sorkar school tem nung dang masü saka nija school tem nunga inyaksüla" ta Commissioner & Secretary, School Education, SCERT & Vice Chairman Nagaland Education Mission Society, Kevileno Angami-i ashi.

Foundational Literacy and Numeracy kübok sorkari kaketshirtem learning, comprehension aser math nung tajungba akümsü meranger, ta Kevileno-i ashi.

Asenoki azüingtsü yimya sübaba ajanga dang tajungba angazüktsü. Iba Reading Festival ya micro improving plan ka lir,

ta laisa ashi.

"Shisaliok ya kanga tashitait aser iba ajanga lokti nung temeten, jenjang kasa bener arutettsü aser meimchir temeteba akümsü" ta Kevileno-isa shisem.

"School tem nung Micro-Improvement Approach benshiba state tematiba 5 rongnung Nagaland dena lir. Iba maparen ajanga reading and learning nung inyakyim tasen nguteter aser DIKSHA project atema lenmang sadema lapoktsür" ta Principal Director, School Education, Thavaseelan K-ia ashi.

"Foundational literacy nung azüingba ya kanga tongtipang lir. DIKSHA portal, GoI kübok Micro Improvement Plan nung NRF agi aser iba ajanga school tekolakpurtem aser tesayurtemi aika angazükogo" ta State Mission Director Samagra Shiksha, Tamsunaro Aier-ia ashi.

Nagaland Reading Festival nung EBRC, Wokha kübok Government Primary School, Orchid-i mezüngbuba jenjang, Tuensang kübok Government Middle School, Longdang-i tanabuba aser Government Middle School, Piphema Bazar, Chumukedima-i tasembuba jenjang takoktem angu.

OFFICE OF THE  
**AO SENDEN**  
"Xübur Asashi" (For the People)

**SANGDONGER**

Indian Constitution Article 371A koba agi asenok Naga nunger temeden wazükja lir iba nung ajemdaker Nagaland Municipal Act 2001 nung Naga nunger sobaliba den mapetba inyakyim densema aliba ajiteta Nagaland nung Naga nunger lokti tentettem ajaki NMA 2001 yanglushitsü atema takhangba Nagaland Govt nem mapang balala nung agüja aruogo. Ajioda Naga nunger ola angaa 14 Buba Nagaland Legislative Assembly ajanga NMA 2001 rangben agienogo. Nagaland Govt.i iba lemtet agiba ajanga Supreme Court-i Nagaland Govt, Kohima, Dimapur, Mokochung Municipal Council tem, Angami Public Organisation, Eastern Nagaland Peoples Organisation, okadaki jaoka lir. Iba keno nung Naga nunger temeden wazüka ayutsü mechi nung Naga nunger Tribal Hoho aser lokti tentet ajak bangjemtepa lungjemer shilem agia arudar. Anungji asen kin sobaliba aser temeden wazüka ayutsü atema nütsüng nübur ajaki Naga nunger lemtet nung tashi angatepa anidaktsü aser yariteptsü Ao sünak abener ajak dangi ayimoktsür.

Sd/-  
**CHUBAWATILONGCHAR**  
President

Sd/-  
**IMTIPOKYIM**  
Gen. Secretary

## Mokokchung nung Tribal Artisan Mela tenzükogo



Town Hall, Mokokchung nung May 12, 2023 nü Tribal Artisan Mela alidang Deputy Commissioner, Mokokchung, Shashank Pratap Singh IAS-i local artisan tem den sensaksemba noksa nung angur.

**Dimapur, Monupii/May 12 (TYO):** Mokokchung Town Hall nung ananü Tribal Artisans Mela (TAM) sentong May 12, 2023 nü tenzükogo, koba "Marketing and logistic development for promoting tribal products from North Eastern Region (PTRNER)" sentong ka ama Ministry of Tribal Affairs, Government of India kübok Tribal Cooperative Marketing Development Federation of India Ltd (TRIFED) ajanga state implementing agency MARCOFED den lungjemer ayongzük.

Iba Mela ya Deputy Commissioner, Mokokchung, Shashank Pratap Singh IAS ajanga lapokja liasü.

Iba sentong nung jembidang, shishilempaba

tsütsü jenjang tajungbai bener arutsü asoshi mapang shia implementing agencies aser local artisans tsüngta metetpelatsüla, ta Deputy Commissioner-i ashi.

Shishilempaba tsütsü tesendaktep tajung maliba aser arket nung oset aginüba indang awareness maliba ajanga artisans temi state alema parnok shishilempa mesüteter, anungji maongka tajungba lapoktsütsü asoshi tim agency temi awareness agütsütsüla, ta pai ashi.

Kanga sashia toktepa market nung local artisan temi tangsa tang tajanzük angutsü bushiba ya mapet lir, anungji iba atema junga shisadangtsü nüngdaker, ta pai ashi.

Paisa region nung balaka anguba product tejangja tali

ajungkettsü nüngdak, ta ashi.

Col. M.Mehra, GM, TRIFED Head Office ajanga o tatsüka jembidang, local product tem jangjateta marketing platform tajungba ajanga inlokdahtsütsü aser ano jenjang tajungba kumdaktsüba nung yaritsü atema TRIFED ya yangi lir, ta ashi.

Iba Mela tenzükba sentong nung menden Thehose Sangtam, Asst. Manager & Nodal officer for MSP& MFP scheme MARCOFED liasü aser Asif Ekbal Hussain, Senior program Executive, TRIFED North East ajanga melepzüng o jembia liasü.

Iba ananü Mela nungya local artisan temi ajangetba osettem sayutsü asoshi sapang agütsütsü aser PTRNER kübok teyari agitsü.

## Nagaland Reading Festival indang sempet agütsü



Advisor, School Education & SCERT, Dr. Kekhrielhoulie Yhome-i Nagaland Reading Festival mapang NRP & National Kala Utsav nung takoker nem sempet agütsüba noksa.

**Dimapur, Monupii/May 12 (TYO):** Nagaland Reading Festival atema State Level Award agütsüba sentong ka NBCC Convention Centre, Kohima nung May 12, 2023 nü School Education Directorate & Samagra Shiksha Nagaland ajanga Shiksha Lokam, Bangalore den lungjemer ayongzük liasü.

Advisor, School Education & SCERT, Dr. Kekhrielhoulie Yhome-i iba sentong nung jembidang, Naga nung kaket azüngtsü ajungmesotsü asoshi iba benjong ya among, ta ashi.

Naga nung ajaki oshi balala shia lir aser meteta lir aser iba yongji skill development balala nung yarir. Azüngba ajanga Attention, Visual Processing, Auditory Processing, Working, Short-Term and Long-Term Memory, Sensory Integration amala tajungba kimdaksür, ta pai ashi.

Anungji pai kaketshirtem dang meranga azüngtsü ajungshi aser ibaji ajanga angatetba nung tashi itdaksür aser ibaji ajanga angazüktsü temelaba kumdaksür, ta pai ashi.

Yhome-i lenirtem adokdahtsütsü aser tesayurtem tushia amshitsü ayongzük liasü.

Tanurtem aser state renloksü atema tajemzükba jenjang nung alirtem asoshi tesayur temi inyaktsüla, ta pai ashi.

Iba sentong nung Advisor Yhome-i NIPUN Nagaland kübok Literacy & Numeracy Fest, Teachers Resource Package, aser NIPUN App semzükja liasü.

Commissioner & Secretary, School Education, SCERT & Vice Chairman NEMS, Kevileno Angami-i ashiba agi, lokti ka aintsü asoshi shisaliok ya tashi tait hadir ka lir aser shisaliok ajanga dang meimchir sempet amshiteter.

Azüngba benjong ya tuluba kumdaktsütsüla aser private school tem nunga tenzüktsüla aser azüngtsü yimya süpaba ajanga nisung ajak angazükba nung tajungba akumtsü. Tanurtem nem shisaliok agütsütsü ya fundamental right lir aser shisaliok agütsütsü ya nürburtem mapa lir, ta lai ashi.

(Maneni tapak 8 nung...)

## Mokokchung aser Tuensang DPDB senden ayonger

**Dimapur, Monupii/May 12 (TYO):** Mokokchung nung ita shia amenba District Planning & Development Board (DPDB) senden April aser May 2023 atema Deputy Commissioner, Mokokchung indang Conference Hall nung May 17, 2023 anepdang 11:00 ako nungi amentsü, ta Deputy Commissioner aser Vice Chairman, District Planning and Development Board (DPDB) Mokokchung, Shashank Pratap Singh IAS ajanga sangdong ka nung metetdaksü.

Iba senden nung züngsem ajak medema arua adentsü

ayongzük, ta sangdong ajanga ashi.

Ano sangdong ka nung, Tuensang District Planning & Development Board senden May 18, 2023 nü Deputy Commissioner, Tuensang indang Conference Hall nung anepdang 11:00 ako nungi amentsü, ta Vice Chairman DPDB aser Deputy Commissioner, Tuensang, Nokchasashi NCS ajanga metetdaksü.

Iba senden nung züngsem ajak medema arua adentsü metetdaksür, ta sangdong ajangasa ashi.

## IMDH Mokokchung nung International Nurses Day amung

**Dimapur, Monupii/May 12 (TYO):** Alima ajanga den külemi IMDH Mokokchung nung May 12, 2023 nü "Our Nurses. Our future" omen kübok International Nurses Day munga liasü.

Iba anogomung sentong nung tongti tesemdang ka ama jembidang Dr. Kibangkumba, CMO Mokokchung ajanga Nurses ajanga dang bendanga agütsüshir tenzüktsü ayongzük liasü.

Health care institution ajak nung Nurses ya tongtired lir, anungji sorkari tenzüktsüba health program ajak mapa kuma inyaktsüla, ta pai ayongzük.

Pei mapa tajungtiba nung inyaktsü asoshi ajak dang update asütsü pai ayongzük.

Omen nung ajemdaker jembidang Lipoksangla N/T ajanga ashiba agi, nurse temi meimchir tenzükba benjonga iba anogo ya amunger.

Nurse tem ya nürburtem tenzükba nung yakbang sür nokdala lir, anungji parnok mapa inyakba mapang nürburtemi meimtsüla, ta lai ashi.

Iba sentong nung menden T. Temsusenla Aier, V/P. SON liasü, Pastor MTBA ajanga nurse tem asoshi sarasademtsü aser Imolangla Jamir N/T ajanga melepzüng o jembia liasü.

## NNC CEC senden May 17 nü alitsü

**Kohima, Monupii/May 12 (TYO):** Naga National Council (NNC) indang Central Executive Council (CEC) senden ka May 17, 2023 anepdang 10:00 ako nungi tenzükba Chedema Peace Camp nung alitsü.

NNC joint secretary Acuyi Vadeo ajanga sangdong ka nung

ashiba agi, May 16, 2023 nü Naga Plebiscite Day amungba sülen iba senden ya amentsü.

Iba senden nung tongtipang ken o kar jembitsü aser taoba mapang renema aliba pangzüng lepa repringshitsü. Anungji CEC züngsem ajak iba senden nung arua adentsü ayongzük, ta sangdong ajanga ashi.

## St. Joseph University 2 buba Convocation sentong agiogo

**Dimapur, Monupii/May 12 (TYO):** St. Joseph University pur 2 buba Convocation sentong Ikishe Model Village, Chumoukedima nung May 12, 2023 nü agia liasü.

Iba sentong nung jembidang Nagaland Governor La Ganesan-i Under Graduate, Post Graduate aser Doctoral Degrees anguba aser training balala agiba kaketshir nem tenüngsang agütsü liasü.

Convocation sentong ya parnok ajak asoshi tongtipang mapang ka lir, ibai benjongba anogo ka lir, tayongzükba balala ajangshibatem bilemtetba anogo ka lir, ta pai ashi.

Parnok (kaketshir) atema alima nung tayongzükba aser maongka tulu ata lir aser parnoki aji ajangshitsüla aser lokti ajungtsü asoshi bendanga agütsür inyaktsüla, ta ashi.

"Takum asoshi tongtipang

telemtetba agitsü mapang lir, aser küm ter tejakdang aliba lanurtem dang tali tanü lanurtem nungi alimai akhanger. Ozüng aikati asen takum alener lir saka takok angutsü asoshi ozüng balaka mali saka meranga inyaktsü aser tasa junga yanglua aji mapa kuma inyaktsüb dang lir," ta pai ashi.

Iba anogo nung kaketshir temi meranga inyaktetba kisüng masü saka kinunger temi parnok yariba atema tenüngsang agütsütsü kanga tongtipang lir, kechiaser higher education bushiba nung taa lir, ta pai ashi.

Higher education tsütsü iba university ajanga shilem tulu agia education tajung agütsür aser sempet jenti aketba tesayurtem lir aser linük nung university tajungtiba rongnung ka akumer, ta Governor-i ashi.

(Maneni tapak 8 nung...)



May 12, 2023 nü Gandhinagar nung Ato kilonser, Narendra Modi-i terenlok project aika tenzüksüba temaisü beneficiary ka nem jabi agütsüba noksa nung angur.

### West Bengal sorkari cyclone 'Mocha' atema renemshidar

### Northeast nung aliba state tem nung tzünglu sashia arutsü

New Delhi, Monupii/May 12 (Agencies): West Bengal sorkari cyclone 'Mocha' atema renemshiba mapang nung National Disaster Response Force (NDRF)-ia team 8 den kümzükbaren mapa inyaksü atema nisung 200 West Bengal kübok Digha-i yokogo.

West Bengal sorkari tziyümkümlen aliba districts nung ali nemzüka aliba tesemtem nungi nisung aika aienshidakja shelters nung jenokdaksüogo.

Purba Medinipur aser South 24 Parganas district na den Sundarbans tesem kar nungi nisung aika aienshidaksüogo aser süki den tziu tajemtsü, mamatzü powder, chiyungtsü takok, kinü tanur chiyungtsü aser mozü balala renema lir, ta ketdangser kati metetdaksü.

Osangbener den jembidang ketdangseri, "Weather office ajanga Cyclone Mocha ji West Bengal paidoka aotsü ta asadangtetogo, ajisiüaka onoki

iba yipru atema renema lir," ta metetdaksü.

'Mocha' yipru ya Amongnü (May 14) Bangladesh-Myanmar arrtsülen atongtsü, ta India Meteorological Department (IMD)-i metetdaksüogo.

Ketdangsertemi Hokolbar nungi tenzüka anogo asemnü ango apui tziyümi maotsü atema anogopurtem nem tekümdangtsü metetdaksüogo.

Hokolbarnü IMD-i, cyclone 'Mocha' tesashiba kümдар, ta metetdaksüba sülen NDRF team 8 Digha-i yok. IMD-i 'Mocha' yipru ya May 14 tashi nung tesashiba akümtsü, ta metetdaksü.

"May 12 tashi nung CycloneMocha yipru sashia akümtsü aser May 14 tashi nungbo kanga tesashiba akümtsü, ta asadangtetogo," ta Hokolbarnü NDRF 2nd Battalion nung Commandant, Gurminder Singh-i metetdaksü.

"Onoki team ti yokogo.

NDRF nungi kümzüka maparen inyaksü atema nisung 200 yokogo aser ano nisung 100 renema lir," ta pai metetdaksü.

IMD nung senior scientist, Sanjeev Dwivedi-i, "Cyclonic yipru ya meyiptsüa akok aser May 12 nikongdang central Bay of Bengal nung iba yipru tesashiba akümtsü. May 13 nü ano iba yipru kanga tesashiba akümtsü," ta metetdaksü.

IMD-isa, cyclone Mocha ajanga Honibar aser Amongnü Tripura, Mizoram, Nagaland, southern Assam aser Manipur tesem kar nung tzünglu sashia arutsü, ta metetdaksü.

IMD-i iba yipru ya Amongnü anüngdang southeast Bangladesh aser north Myanmar tziyümkümlen Cox's Bazar (Bangladesh) aser Kyaukpyu (Myanmar) na tsüngda süitsü aser iba mapang nungji yipru mopungji ghonda ka nung kilometer 150 nungi 165 tashi kera aontsü, ta metetdaksü.

### Kerala nung kinü tanur ka sozükli tsüraburi alenseta südaksü

Thiruvananthapuram, May 12 (Agencies): Kerala nung Kumbummettu kübok Shantipuram nung tangalen nungi arua süngo-lu nung aayanger tsüraburi pei chir sozükli tekong nung alenseta südaksüba sülen nisung ka puogo, ta Hokolbarnü police-i metetdaksü.

Madhya Pradesh nungi nüknürar anati May 7 anepdang züngia kinü tanurji alenseta südaksü. Iba tatalokba dak

sendakba nung arrshi küm 23 tebur ka puogo, ta police-i metetdaksü.

Pa tedongjibo local hospital ka nung mongdar aser police-i la mita reprangdar.

"Tanurji kasa anogo (May 7) nungji anepdang züngia 12:30 ako nung aso. Ki kibur jagi tanur asoba aser anepdang 6:30 ako nung asübaji meteta liasü," ta police-i ashi.

Ki kibur jagi tanurji süadoker ama angu aser tsürabur anaji

jepa liasü, ajisiüaka post-mortem agiba ajanga tanurji tekong nung alenseta südaksüba liasü ta doctor temi metet.

Police-i asüngdangyaba mapang nung tanur tebu jagi par chir tepsetbaji nangzüka liasü.

Police-i IPC kübok arrla balala nung ajemdaker tebursang anema ken o benokogo aser tetsürlajia kobi melii police-i aputsü, ta police-isa metetdaksü.



New Delhi nung Dalit tsür ka tashiyim amshia raksatsür tepsetba tatalokba anema May 12, 2023 nü Delhi BJP Mahila Morcha züngsemtemi Delhi Chief Minister, Arvind Kejriwal'er kima longkak aيتدang tangokba noksa nung angur.

### Maharashtra nung assembly election agishitsüla: Uddhav Thackeray

Mumbai, May 12 (Agencies): Hokolbarnü taoba mapang Maharashtra Chief Minister, Uddhav Thackeray-i state nung assembly election agishitsü takhangba agütsü.

Thackeray-i Chief Minister, Eknath Shinde aser BJP dang elections agishitsü jazük.

"Asenoki election agishidi aser nüburttem nem telemtetba agidaksüdi, ta ni jazüker. Ni menden nungi anenba ama Chief Minister (Eknath Shinde)-ia menden nungi anentsüla," ta pai ashi.

Osangbener den jembidang Thackeray-i, yaküm party anema apusoba Shiv Sena MLA tem anentsütsü atema Assembly Speaker-i telemtetba magira pai ano maneni Supreme Court ajurutsü, ta metetdaksü.

"Tamalen onoki Supreme Court ajuruba ama, speaker-i mapang telatet ka nung telemtetba magira onoki ano Supreme Court ajurutsü. Tang

speaker bendanglen lir. Pa kodang meyipa arudir pai tekaraba nung telemtetba agitsüla," ta pai ashi.

Brihostibarnü Supreme Court-i, yaküm June ita nung taoba Chief Minister Uddhav Thackeray anema apusoba atema court-i Shinde den MLA 15 anentsütsü amok, ta metetdaksü.

"Judges panel tuluba kati obendang magütsü tashibo iba tashiji Speaker dak keta lir," ta SC-i metetdaksü.

Supreme Court-isa, Thackeray sorkar tanaben bener arutsü onoki tuyutsü makok, kechiyong pai assembly nung majority mesayui menden nungi anentsü telemtetba agi, ta metetdakja liasü.

Supreme Court-i, yaküm June 30 nü Maharashtra Angh, Bhagat Singh Koshyari-i assembly nung majority sayutsü atema Uddhav Thackeray jaokba tu tim masü, ta metetdaksü.



May 12, 2023 nü Niigata, Japan nung G7 Finance Minister tem aser Central Bank Governor tem senden alidang India Finance Minister, Nirmala Sitharaman-i IMF MD, K Georgieva ajurudang tangokba noksa nung angur.

### JD(S) medeni Karnataka nung sorkar akümtsü makok: HD Kumaraswamy

New Delhi, May 12 (Agencies): Janata Dal Secular (JDS)-i, parnok teyari medenibo Karnataka nung shingaia sorkar akümtsü makok, ta metetdaksü.

JD(S) lenir, HD Kumaraswamy-i, exit polls balala ajanga Karnataka nung shingaia pei kijai sorkar akümtsü makok (hung assembly) ta asadangtetogo, ibayongji Congress aser BJP napronglai parnok den jembidar, ta metetdaksü.

JDS tentetsang, HD Deve Gowda temang manemi dang aliba agi Kumaraswamy party nung tongti lenir kümogo. Tang Gowda Singapore nung treatment agidar.

JD(S) lenir, Tanveer Ahmed-i, "Ajisiüaka tongti lenir katibo shirnok yaritsüar telemtetba agiogo ta shiogo. Telemtetba agiogo. Mapang tetemsü nung onoki ibaji metetdaksütsü," ta ashi.

BJP-ibo parnoki JD(S) den kecha mejembir aser party-i majority ngua sorkar akümtsü

ta shiogo.

BJP lenir, Shobha Karandlaje-i, "Teloktep atema mejembir, BJP-i JD(S) den tongtepratep masü. Onoki menden 120 nung takok angutsü. Yashi onoki party nung inyakertem dang nungi osang bendenba sülen onoki menden 120 angutsü ta asadangtetogo," ta metetdaksü.

JD(S) lenir, Ahmed-i, "Au, party anapronglai (BJP aser Congress)-i onok den tongteprateper. Party temi onok teyari bushitsüsa tensa ka nung lir," ta ashi.

Ahmed-i, "State ajungtsü atema Karnataka nung alirtemi onok nem national party anapronglaji mita reprangdaksüner," ta ashi.

Ahmed-isa, "Onok medenibo shingaia sorkar mekümtetsü. Sen aser tashi sasep nung onok national party tem den medemdangtsü makok. Onok ya tashimait party ka lir, ajisiüaka sorkar nung shilem agitsüsabonoki inyaktetogo," ta metetdaksü.



# TIR YIMYIM

## YIMOBILEM (EDITORIAL)

DIMAPUR

KÜPTOKNÜ

MONUPII 13, 2023

### Asenoki lapokba Industry

**N**agaland nung nübertem nüngdak kechisarina yangluba industry karbo lir, itemji Dimapur nung teimba aser tenüngbo Naga nung tenüng saka kiburbo tsümartem asütsü. Item dakji alaka Naga nungertemi takok ngua lapoka aliba industry-bo ana dang lir. Ana rongnungji ka Ochimashi aser kaji Rakzükratemba industry asütsü. Iba Ochimashi industry ya kanga tulu aser inyaker tema aika, kechiyong Nagaland nung Naga nungerto tuluba nungi shir tilatiba tashi putirtem dena iba industry nung inyaker. Iba industry nung yabo nübertem dang ayoktsü atema parnok nüngdakba oset mesüra chiyongtsü ka yanglur masü saka sen dang yanglur, anungji noklang nung noklang tajangzük ngua inyaker. Ajisüaka, iba tajangzük ya ajak dangi aoer masü saka industry kibur kar dangi dang aoer. Ibayongji, Ochimashi industry kiburtem karbo manger sangwa nung takar akümer aser tanüngba purtemjibo meilongi meilongi tesensakba - tesensakba küma kilir dang nungi teküpokba jenjang nung alar kümer alir. Item alartemji election matong tashi angati chiyongtsü agüja mesüa atatsü aser election mapang parnok vote-ji parnok alartem meyong sen agi alitsü. Iba jagi alima tensabo tamajungba akümer, kechiyong alartemji kar ano yi lar aser ano kar mozü lar ta küma aoer aser aika kibur kübok timtema ali marem jena orr tashiyim agi Rakzükratemba industry-ji lapoka yangji mapa tenzük. Iba jagi Nagaland nung Naga nungertemi lapokba industry ka dang masü saka industry tulu ana kümogo. Tanga state-tem nungbo Nagaland nung lapokba Ochimashi aser Rakzükratemba industry-tem yabo kenyonji melapokdaksütsü meranger, iba jagi government nung ketdangser kati danga nisung kar dang danga sübokrem meshiba putetra, idangjisa nemeta pur tepuokdaki yoker aser temerenshi agütsür. Iba ama osangji asen kidanger Assam nungbo anogo shia angashir. Iba ama tatalokba ka nung yakanüa Assam nungbo Baksa district kübok Irrigation department nung Assistant Engineer kati contractor ka nem work order agütsütsü atema sübokrem sen meyrirjang semer meshiba puteta Vigilance & Anti Corruption nung Assam police-temi paji apuba osang angashiogo. Atangji, Assam nung Vigilance aser Anti Corruption police-temi government mapatem nung sübokrem meshirtem apubaji parnoksasa puteta apur masü saka sübokrem mesüra pei mapa nungi shilem (percentage) ka angati agütsütsüsa akümba purtem contractor mesüra beneficiary-temi miima parnok dang ashi nung dang, parnok külemi tasa atonger sübokrem meshirtemji apur. Ibaji kodang bilemdangdir, Nagaland nung ochimashi sübokrem, percentage aser commission agiba otsü aika jembibabo angashir saka contractor mesüra beneficiary shingaia itemji anema ola madoker aser tashitsü purtem dang shia mepudaksür. Tetezüji, Nagaland nungbo ochimashi mapatem ya tangatetep nung inyaker. Iba jagi asenok asoshibo ochimashi-ang shitak aser ochi-ang meshitak ta kümogo. Aji oda, ochishia alirtemi lokti aser arogo nem tenla tulu magütsüteter saka ochimashirtemibo tenla tulu agütsütetter, anungji lokti nung aser arogo nung ochimashirtem jaoka asüng lenir akümtsü pur tanurtem tsüngdang tetushi aser tenüngsang tulu agüja sayur. Iba jagi asenoki tanurtem mangmangdaksür aser mashileni anir. Ibaji kin ka ajungkettsü atema aniba temeshiba aser teindangba lenmangji masü. Asenoki ochi nung amanger masü saka angati anguba tenla aser rongsen tulu nung amanger, anungji koba shitakba ta masü saka koba tuluba aser teimba ta asübalen asenok anidaker. Iba jagi asenok nem Tsüngremi moatsüba tokolok, tashi aser shisatsü agi asen lima nungia tangar nüngdakbatem karbo yangluteta yoktsüsa industry lapoktsü melen mapa meinyaki manger sangwa nung takar akümba Ochimashi aser Rakzükratemba industry kiburtem asütsü raktepa amonger. Atangji, industry kibur asünungji sen aser kiojen nungbo nisung ishikabo takar kümogo saka iba jagi Nagaland takar akümer masü. Aji oda, asen akaba agi Nagaland sensakdaksüba Ochimashiba industry masü saka asen akaba agi Nagaland takar kümdaksüba Ochiba industry lapoka yangji asen tanurtem dena anioka inyakdaksütsü kanga nüngdaka kümogo. Tanüsa asenoki Ochimashi aser Rakzükratemba industry-tem ya shibanger Ochiba industry lapoka putu tasen ka metenzüktetra, tanü asenoki Ochimashi industry nung yangluba rongsentem ya asüng asenoki repranga lia mitsü akümtsü.

## OLEMSABANG

### Number tenet ya koda tongtibang temeshi lai nungi tetuyuba kar lemsateper

Mr. Y. Imti Tzüdir, Dimapur

(Maneni yashi adok nungi...)

Tejen Lai aser Tasen Lai nung tapu aser tekongtem nung number 7 indang shia angütsü:

1. Lipok 2:2,3; 5:31, 7:4; 8:4,10,12; 21:28, 29:18,20,27,30; 31:23; 41:2-7, 19,20,54; 46:25; 50:10.
2. Anitet 2:16; 78:25; 12:15,19; 13:6,7; 22:30; 23:12,15; 25:37; 29:30,35,37; 34:18; 37:23.
3. Levi 4: 6,17; 8:11, 33, 35; 12:2; 13 :4,5,21,26,31,33,50,54; 14: 7,8,16,27,38,51; 15:5,6,13,24,28; 16: 14,19,29; 22:27; 23:3,6,8,15,16, 18,24, 27, 34,36,39,40,41,42; 25:8,9, 20; 26:18, 21 ,24,28.
4. Züngdangba 8:2; 6:9;12:14,15; 19:4, 11,12, 14,16, 19,; 23:1, 4.14,29; 28:11, 17,19,21,24,25,27; 29:1, 2, 4, 7, 8, 10, 12, 32; 31: 19,24, 43, 52.
5. Tazüngkunem: 5:14; 7:1; 15:1,9,12; 16:3, 8,9,13, 15; 31:10.
6. Yihusua: 6:4,6,8,15,16; 18:2,5,6,9; 19:40
7. Obendangertem: 6:1, 25; 12:9; 14:12,15,17,18; 16:7,8,13,19
8. Ruth 4:15
9. I Samuel: 2:5; 6:1; 10:8; 11:3; 13:8; 31:13
10. 2 Sam. 2:11; 5:5; 12:18; 21:6,9; 24:13
11. I Chubatem: 2:11; 6:6,38; 7:17; 8:65; 16:15; 18:43
12. 2 Chubatem: 3:9; 4:35; 5:10,14; 8:1,2,2; 11:4,21; 12:1; 18:9; 25:8, 25
13. I Putipuyang: 2:15; 3:4,24; 5:13; 9:25; 10:12; 12:11; 15:26; 24:10; 25:14; 26:3,5; 27:10; 29:27
14. 2 Putipuyang: 5:3; 7:8,9,10; 13:9; 23:1; 24:1; 29:21; 30:21; 31:7; 35:17
15. Ezra: 3:1,6; 6:22; 7:7,8,14
16. Nehimia: 7:73; 8:2, 14,18; 10:31
17. Esther: 1:5,10,14; 2:9,16
18. Yob: 1:2; 2:13; 5:19; 42:8,13
19. T.Ken: 119:164
20. Apijemtsü Shin: 6:16; 9:1; 24:16; 26:16,25
21. Sayutsüngir: 11:2
22. Isaia: 4:1; 11:15; 30:26
23. Yerimia: 15:9; 34:14; 52:25,30,31; 28:17; 41:1
24. Ezekil: 3:15,16; 30:1; 30:20; 39:9,12,14; 40:22,26; 41:3; 43:25,26; 44:26; 45:20, 23,25
25. Daniel: 3:9; 4:16,23,25; 9:25
26. Amos: 5:8
27. Mika: 5:5
28. Hagai: 2:1
29. Zekaria: 3:9; 4:2,10; 7:5; 8:19
30. Mathi: 12:45; 15:34,36,37; 16:10; 18:21,22; 22:25,26,28
31. Mark: 8:5,6,8,20; 12:20,22,23
32. Luk: 2:36; 8:2; 11:26; 17:4; 20:29, 31,33
33. T. Mapa: 6:3; 13:19; 19:14; 20:6; 21:4,8,27; 28:14
34. Ibri: 4:4; 11:30
35. Yihuda: 14
36. Jungkai Adokba: 1:14,11,12,16,20; 2:1; 3:1; 4:5; 5:1,5,6; 8:1,2,6; 10:3,4,7; 11:13,15; 12:3; 13:1; 15:1,6,7,8; 16:1,17; 17:1,7,9,10,11; 21:9,20

Laishiba nung number 7 ya meyrirjang dak tali amshialir. Item tekongtem lapoka züngdangra number 7-ji kechi atema amshi tejangja metettsü aser tangazükba tulu angütsü. Tekong kar nungbo tenetji asemben pezüben tashi amshia lir. Alima shisakartemi number 7 ya tabensa number (Perfect number) ta ashi aser Lai tsütsü nungia ibai Tsüngrem temaitsü ajenba (God's Seal) ta ashir. Zülüjang 7 ji tanga zülüjang tena amshia lir tatishitsü agi: 127, 7000, 700, 57400, 14700, etc. saka itemjibo yangi meinoktsür. Number 7-ji dang masü saka tenetben, tenetbuba, tenetnübuba, etc. item ajak number 7 nung züngsema enoktsür. Laishibaji lapoker azüng nungbo tajungba angatettsü aser tali metettsü.

Tazüngertem moajangma.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir**

# Impur nung Laishibai tuyuba Arogo angazükshiyim sentong agi



**Impur, Monupii/May 12 (TYO):** ABAM Church & Mission Ministry ajanga ayonga Laishibai tuyuba Arogo angazükshiyim sentong Impur nung May 12, 2023 anogo nung ABAM Zone 5,6 & 7 kanga takok ngua agiogo, ta ABAM Executive Secretary, Rev. Dr. Mar Pongener-i sangdong ka ajanga

metetdaksü. Iba sentong nung Arogo 17 nungi tenzükertem 73 arua aden. Iba sentong ya küm aika agia arudar aser Arogotem ajak kecha tebandang makai lirumedema tenzükertemi pei tatah shilem inyaksü nükjidong nung agia arur. Tang tashi nung Arogotem

teimbaka nung tenzükba arrla lirumedema inyaka arudar. Maneni ajaki Tsüngrem tenzükba nung temoatsü agia kati ka ajungshitepa inyaka aotsü ABAM nükla lir, ta kasa sangdong ajanga metetdaksü. Iba sentong nung Shisalen sayurji Rev. Temsuwati, Associate Pastor, MTBA liasü.

# Indonesia-i Germany nunger missionary Prier nem tetushi agütsü



**Missionary, Karl Edmund Prier**

**May 12, 2023:** Indonesia nung art institute kati Germany nunger Jesuit missionary kati linük nung music tsütsü mapa tajung aika inyakba atema tetushi agütsüogo.

Arrshi küm 85 missionary, Karl Edmund Prier-i May 11, 2023 nü Yogyakarta Institute of Arts nungi honorary doctorate (doctor honoris causa) angu; pa den külemi Professor Gunnar Spellmeyer-ia honorary doctorate angu.

Yogyakarta Institute of Arts nung Rector, Timbul Raharjo-i, parnoki mapa tajung inyakba atema Institute-i tetushi agütsür; putir Prier-i music science, talisa liturgical music nung shilem tajung agiogo, ta metetdaksü.

Prier-i 1971 küm nungi 2004 küm tashi (küm 33) iba institute nungji history of music aser review of music repertoire densema subject balala sayua liasü.

Raharjo-i, Prier-i Indonesia kanga meima liasü, ta metetdaksü.

Putir Prier-i Liturgical Music Center nung Arogo music o Indonesia nunger sobaliba na meyokteper ajungketsü atema inyak. 1971 küm Indonesia nunger ken mejemer, Paul Widyawan den senteper Prier-i Liturgical Music Centre ya lapoka liasü. Pai, "Iba Centre nung Arogo music nung rangloker onoki inyak, ajisiuka Indonesia nunger music study asüba ajanga dang iba nükjidongji atalok," ta ashi.

West Sumatra province kübok Mentawai Islands nung pai kentenba yimya tasen nguteta liasü, aser pai iba dangji "healing music," ta aja. Item kenji Shaman nungertemi atener, aser parnoki ashiba agi, item ken atenba ajanga shirangertem mesüra tasü yipten nung alirtem tanela anir aruteter.

Khristan nütsüng teimba aliba Flores asetkong nung pai Keo kin ajuru aser item kin jagi aou agi yangluba kongki balala amshiba pai angazüka liasü.

Prier-isa Liturgical Commission for Bishops kübok Liturgical Music Section nung chairman inyak aser Kentungan, Yogyakarta nung aliba St. Paul Major Seminary nunga church music sayua liasü.

2010 küm nungi choir conductor aser choir trainer, Roland Modestus Jemuru-i, "Ni Prier indang kentem kanga meimer, kechiyong item ken atentsüji kanga temela. Ni aiben pa indang kentem amshi, kechiyong pa kentemji atentsü kanga temela aser lokti tekülem nung loktii part balala tenteter," ta metetdaksü.

Khristan putir Prier ya 1964 küm Indonesia-i oa liasü.

2018 küm February 11 nü Yogyakarta nunga aliba St. Lidwina Arogo nung tekülem sentong agiba mapang nung Islam yimsü alia amanger, Suliyono-i noklang nok ka amshia amakdang Prier densema nisung pezü yiruja liasü.

Tesülen Prier-i Suliyono dang tai atok.

# ANOGO ABEN TSÜNGREM DEN

## Tashi temeteter shisatsü

Shisa akartemji shirnok liasü? Tebilem nung Persia nungi yimsü philosopher tem, anüdoklen ajanga Yihuda nunger den metettepa Yihuda nunger ozüng metetta alirtem liasü südi. Alima ajak akoker ka Yihuda nung asotsü ta küm aika shina liasü aser iba osang Anüdoklen kintem ajanga sangdong. Bendangertemi parnok Tsüngremi parnok mekümzükttetsü ta angateta Tekümzüker ka asoshi parnoki küm aika sarasadema liasü.

Küm meyi ana tejakdang, Tsüngremi Abraham, Ibri nübu tebu, dang tenangzükba ka nangzüka liasü. "Na ajanga alima kidong moatsütsü" (Lipok 12:3). Isaiaia Abraham dang nangzükba temoatsü indang jembi, "Aser kintem ne sangwa nung jajatsü, aser chubatem na adokba sentsüprang nung jajatsü" (Isa 60:3). Item shisa akartem Bendangertem süaka Tsüngremi Abraham dang nangzükba ataloktsü yongyaa liasü. Parnokji techira aser tatalokba tasen bushirtem liasü, aser parnoki Tsüngrem O parnoki angashiba ama amang. Parnok indang asenok dang aika shia meliaka kechiba asenoki parnok dang shisa akartem ta ajar? Parnoki kechi inyak?

# IS-i tepsetba Khristan 21 prongla 'Khrista atema asürtem' ta agizük



May 11, 2023 nü Vatican nung Pope Tawadros II aser Pope Francis na ajurudang tangokba noksa nung angur.

**May 12, 2023:** 2015 küm Libya linük nung Islamic State (Daesh) kiralongrartemi tekolak tangzüka lepsetba Coptic Khristan 21 prongla 'Khrista atema asürtem' ta Vatican-i agizükogo, ta osang ka ajanga metetdaksü.

May 11, 2023 nü Vatican nung Pope Francis-i Coptic Orthodox Church nungi Pope Tawadros II den senden amenba mapang Pope Francis-i iba osang ya metetdakja liasü.

2015 küm February 15 nü Libya kübok Sirte yimti nung aliba tzüyiküm ka nung kiralongrartemi Coptic Khristan 21 (Egypt nunger 20 aser Ghana nunger ka) tekolak tangzüka lepsetba sülen kiralongrartem jagi iba video ji sayaa liasü.

2015 küm February 12 nü Islamic State of Iraq and the Levant (ISIL)-i parnok indang online magazine Dabiq ajanga parnoki Sirte yimti nung apuba Coptic Khristan 21 tekolak tangzüka lepsetba noksa sayaa liasü. Khristantemji kistüjensüba

mapa inyakeritem liasü. Khristantemji Egypt nung yimtsüng balala nungi aruba liasü. Parnok 21 ji kar 2014 küm December 27 nü apu aser kar 2015 küm January ita nung apuba liasü.

Senden nungji Pope Francis-i Tawadros dang, Khristan 21 tenüng 'Khrista atema asürtem' ta züngokba dangji 'Roman Martyrology' mesüra 'calendar of saints' ta ajar, aser parnok tenüng züluokbaji Arogo ana tanela nung longjemdaksüba temaitsü lir, ta ashi.

Roman Pope aser Coptic Pope ka na mezüng ajuruba sülen küm 50 ajungbamong amongtsü atema arrshi küm 70, Tawadros, Vatican-i oa lir. 1973 küm mezüng Roman Pope Paul VI aser Coptic Pope, Shenouda III na ajurua liasü.

Muslim nütsüng teimba aliba Egypt linük nung nütsüng shilem 10 shi dang Coptic Khristantem lir aser Middle East o Africa nunga Coptic Khristan nütsüng ishika dang lir.

**AO OSHI ANGAZÜKDAK:  
TANÜ ANGAZÜKTSÜBA OJANG**



Tir Yimyim

**Pura**

(v) asatet, bilema bilema atongtet (invent)  
\* Onoki ango aputsü oset ka puraa yanglu.

**Purapitet**

(n) nüngdak apiteta yanglu, tasen bushitet (invention)  
\* Sünepbai jero küp asatsü kol ka purapiteta yanglu.

**OLONG PAITEP # 6513**

	1		2		3		4	
	5							
					6			7
8			9					
10		11		12				
								13
				14		15		16
17								
				18				
19								

**TIPIEN**

- 3. Tembang - (5)
- 5. Jala masü - (6)
- 6. Tatem makaba lima - (5)
- 8. Süngzü temerang ka - (3)
- 9. Mimong nung aliba - (3)
- 11. Lung nung tapok - (7)
- 14. Aginüdaktsü - (3)
- 16. Shishilemba dang amshiba - (3)
- 17. Süngküm - (5)
- 18. Tenük majung - (6)
- 19. Temzüng - (5)

**LANGTSÜNGLEN**

- 1. Ngyuyutep - (5)
- 2. Tetsüng agi ao - (4)
- 3. Raratep - (6)
- 4. Temekong masü - (6)
- 7. Saku - (4)
- 10. Sü atakdang amshiba - (4)
- 11. Kiochtsü tapu ka - (6)
- 12. Tzü mamongba tou - (6)
- 13. Tekolak sobutsü - (5)
- 15. Jenti - (4)

**OLONG PAITEP # 6512 TELANGZÜBA**

**TIPIEN :**

- 5. Ajak, 6. Wabong, 8. Taju,
- 10. Oya, 11. Talila, 13. Likok,
- 15. Laktet, 17. Yok, 19. Magi,
- 21. Teyari, 22. Aiwa.

**LANGTSÜNGLEN :**


- 1. Ratet, 2. San, 3. Taru,
- 4. Soro, 7. Tali, 8. Tila, 9. Jakla,
- 12. Akki, 14. Oagi, 16. Tasak,
- 18. Keyi, 19. Mori, 20. Kin.

**NAI-A YA METETTER MA**



Tila tanurtemi anogoshia noklang pezüben shi menür ta mongintemi ashi. Aji oda süaka, nisung taintemibo anogo nung ter pongben shi (on average) dang menür.

**Noksa nung meputepi aliba 5 bushiang**



**Meitei Pangal nungeri Manipur nung yimjung atema sarasademer**



Manipur kübok tesem ka nung relief camp nung nisungtem jenoka aliba angur.

**Imphal, May 12, 2023**

**(Agencies):** Manipuri Muslim nungertemi May 12 nü state kübok tesem balala nung lokti sarasadem sentongtem ayonga agiogo.

Parnok dang ya Meitei Pangals ta ajar aser May 3 nungi Manipur nung lokti tsüingda mepetmesü adoka tensa mejungi akümba atema sarasadem. Parnoki Manipur

nung yimjung aser azükaru atema sarasadema liasü.

"Manipur nung tawa lendong balala atalokdang nisung taküm aser kiojen samaba atema tebilemtsü abener" ta All Manipur Muslim Organisations Coordinating Committee (AMMOCC) President SM Jalal-i ashi.

Manipur nung Muslim nunger telok balala yimjung

mapa inyachtsü aser nüngdakbapur nem teyari agütsütsü atema longjemer, ta pai ashi.

"Kin dang merangloki onoki takoksa ajurur ajak yaritsü" ta Jalal-isa ashi.

Meitei Pangal nungeri Manipur kübok tesem balala nung temporary relief camps lapoka lir aser pei pei talidak takoksa ajururtem yarir.

**Manipur tensa ajanga AK Mishra-i Tripura semdangtsü aliba athi**

**Agartala, May 12, 2023**

**(Agencies):** Government of India for Northeast Affairs to Tripura indang Advisor AK Mishra-i May 12, 2023 nü Tripura semdangtsü aliba thinenogo.

Mishra-i TIPRA Motha takhangba atema inyaker aser pai Chief Minister Dr Manik Saha den ajuruteptsü sentong liasü ta osang ajanga ashi.

Paisa Tipra Motha chairman Pradyot Kishore Manikyadebbarma aser Indigenous People's Front of Tripura (IPFT) lennirtem den ajuruteptsüba liasü.

Manipur nung tawa tensa mejungi akümba ajanga iba sentong athi ta TIPRA Motha chairman Pradyot-i ashi.

May 11 aonung Manipur nunger nisung pezü asü aser Kuki BJP MLA 10 nungi 8-i

state balala meshir. Item onüktem ajanga Advisor Mishra-i Tripura semdangtsü aliba athi ta Pradyot-i ashi.

Tripura politics nung TIPRA Motha-i akhangba onük ya tongtipang lir aser lisopur aikati parnok temeten aser tashi meshir.

Mishra-i iba onük jembitsü atema Tripura semdangtsüba liasü saka Manipur tensa ajanga pai athi.

**Jaintia aser Karbi nunger tsüingda mepetmesü adoka raratep**

**Shillong, May 12, 2023**

**(Agencies):** West Jaintia Hills District kübok Assam aser Meghalaya arrtsü anasa Jaintia (Pnars) aser Karbi nunger tsüingda mepetmesü adoka raratep.

Khanduli nung Dorbar Shnong-i parnok yim adena Karbi nunger Lendong nung Karbi mesenzüdaktsütsü nokdangba ajanga mepetmesü adok ta

osang angazüker.

Karbi nunger telok kati Khanduli nunger dang pei alui maotsü amokmerenba sülen Dorbar Shnong-i iba lemtet agia liasü.

Iba mapang telok ana tsüingda lung agi ontepa raratep aser ki ana rongdoktsü.

Lendong nung Karbi Anglong nungi nisung ana yiru aser tena Hojai nung mozü ki

ka nung anepaludar ta osang angazüker.

Iba mapang nisung telok jagi tejashi nung West Jaintia Hills indang SP gari nung lung agi ona amak. Ajisüaka iba tatalokba mapang SP jena oter.

Külen, Meghalaya aser Assam nungi district administration temi arrtsülen tensa azüoktsü atema mapa inyakdar.



Guwahati nungi Saubhagya Sharma-i Madhuri Dixit Nene ket nungi Youngest Philanthropist of the Year in Animal Welfare agizükba angur. May 7 nü Mumbai nung Global Excellence Awards 2023 sentong nung Saubhagya-i iba sempet agizüka liasü. Saubhagya-i tanur asü dang nungi shiruru kanga meima anepalur aser The Federation of Indian Animals Protection Organisations (FIAPO), Peta India, PFA aser ano telok aika den lai yaritepa arur. Lai Elmira Strange, University of Whales, UK aser Celtic Learning Solution, Akshaya Kawle, Mumbai kübok animal communication & psychology diploma agiogo.

# KODANGA MAMATETER



Asür Kümsangnokdang (Chuchuyimlang) Tasüba anogo : 13th May, 2022.

Onoki teti meima aliba aser amadoktsü makokba taremsük obala, na akümüli wadang tembanger tanü küm ka ajungdang nü temeim kanga menungraa bilemteter. Na onok den meliaka nü temeimbo onok mulungjang nung teti lir. Tanüa onoki na menungraseta bilemteta sarasadema amonger.

- Temeim Chirnurtem, Anükapang aser Semchirtem.

## Islamabad court nungi Imran Khan hopta ana bail agütsü

Islamabad, Monupii/May 12 (Agencies):

Pakistan nung aliba court kati taoba Pakistan ato kilonser Imran Khan nem hopta bail agütsüogo, shiba ochimashi ken o nung hopta tetenzüklen pua liasü.

Islamabad High Court nung züngsem ana aliba bench kati linük indang National Accountability Bureau (NAB) ajanga pua aluba opposition lenir nem Hokulbarnü bail agütsü.

Pakistan Tehreek-e-Insaf (PTI) party tekolakba ya Mongulbarnü kasa court nung pua liasü.

Brehostibar nikongdang Supreme Court ajanga pa apuba ya ozüing agi memelaba mapa ka lir ta sangdong aser ketdangsurtem dang Khan ya Islamabad court-i Hokulbarnü anir arutsü ashi.

Al-Qadir Trust ken o nung Khan-i bail bushiba Hokulbarnep jembitsü liasü. Saka ghonda pezü jungnüa agi menu, kechiaser tetungta nung sarasadem mapang agia liasü.

Ken o tanaben jembitsü ataa alidang arishi küm 70 tain yimten yimsüsüri osangbener dang ashiba agi, pa court telungzük nungi tashiyim amshia apu.

"Ni high court nung mena liasü. Parnoki ni aputsü kuli kecha meliasü. Ni yangnungi tashiyim amshia pua bener ao. Aser ni pua bener aoba mapang ang küdang aputsü tuyuba sayu," ta pai ashi.

"Ibai arem indang ozüing asü? Mitkar temi tashiyim amshia ni pua bener ao. Police kong ali? Ozüing kong ali? Yangi martial law sangdonga lir mesük."

Mongulbarnü Khan apuba ajanga linük tesem ajungalen kanga sashia longkak ait tenzük, kong pa bukumer temi police aser paramilitary forces den raratepa liasü. Yimti kar nung nüburtem ain adoka mitkartem aliba tesem densema ki balala sapang aser mi senloktsü.

Tan hopta longkak aitba mapang nisung 11 asüba aser aika yiruba osang lir. Ketdangsurtemi ashiba agi, Khan'er PTI lenirtem densema nisung 2,500 dak tema puogo.

Tensa azüoktsü mechi sorkari linük yimtiba, Islamabad aser Punjab aser Pakhtunkhwa province tem nung mitkartem yoka liasü, kong Khan'er party tashi ita lir.

Longkak aitba azüoktsü mechi linük tesem ajungalen anogo ishika internet shibangia liasü aser YouTube, Facebook, Twitter aser Instagram ama social media sapang tem okdanga liasü.

Islamabad court ajanga Khan nem anisungzük agütsüra tanaben aputsü ta Ato Kilonser Shehbaz Sharif'er sorkari nangzuka lir.

"Onoki pa ano aputsü. Asüing (Hokulbarnü) high court nungi pa nem bail agütsüra, onoki bail agientsüba atatsü aser ano aputsü," ta Interior Minister Rana Sanaullah-i osangbener dang shia liasü.

Ajisüaka Islamabad High Court ajanga Imran Khan ya ken o kecha nunga May 17 tashi maputsü totuyuba agütsüogo. May 9 sülen benokba ken o ajak nung pa nem bail agütsüogo. Saka iba obendanga ya Islamabad indang arütsü telungzük nung dang lir, ta ashi.

Taruba mapang ken o jembidang ajak renemer arutsü totuyuba agütsü.

Pakistan Tehreek-e-Insaf (PTI) tekolakba ya tim masüba lenmang nungi sepokrem sen million aika agizüka lir ta tai tonglokja lir. Pa kinungtsü Bushra Bibi-a iba ochimashi mapa inyakba nung shilem agia lir ta aitsür.

Al-Qadir Trust ken o nung Imran Khan nem bail agütsüba atema Pakistan Ato Kilonser Shehbaz Sharif-i Hokulbarnü Pakistan Supreme Court aija liasü.

Shehbaz Sharif-i ruling

Pakistan Democratic Movement (PDM) coalition ajurutsü aser emergency benoktsü atema jembitsü, ta osang kar ajanga ashir.

"Anatsü nok agi Pakistan nung obendanga südaktsüogo," ta Sharif-i ashi.

"Yashi pa (Imran Khan) okadaki arudang Pakistan indang chief justice-i na ngua pelar ta ashi. Aser pai iba oji ochimashi ken o ka nung ashi," ta Pakistan ato kilonseri ashi.

PTI ajanga linük indang security tashiyim amshia sapanga ayur. 1973 küm Dhaka laodanga iba ama rongrongshirong majuru, ta pai Liberation of Bangladesh indang athishia ashi, kong Indian Army temi Bangladesh n8ung Sheikh Mujibur Rehman-i aniba Muktijoddhas yaria Pakistan army atsüingdoka liasü.

Linük rongsenketzung jenjang tamajung leni ani, ta pai Imran Khan aitsü. "Tang sen mapang tamajung nung lir ta ajaki meteta lir, aser onoki senmang ama tayongzükbatem agizükba ajanga tensa tamajungba kumdaktsür. Taoba sorkari IMF den tezüngzüktep ka aliba nung aibelen aser onoki aji yanglushitsü meranger," ta pai ashi.

Pakistan nung court tulutibai anisungzük agütsüba ya 'NRO' den sako lir, ta Sharif-i ashi.

General Pervez Musharraf-i 2007 nung National Reconciliation Ordinance (NRO) benoka January 1, 1986 aser October 12, 1999 tsüingta yimten yimsüsür, political worker aser bureaucrats tem ochimashi mapa inyakba, nisung tepsetba aser kiralongra mapa amala inyakba asoshi tepuokdak alir nem tatok agüja liasü.

"Nenoki iba nisungba bukumnüra nenoki linük nung tepuokdak alir mapang tamajung inyaker ajak chioktsüla," ta Shehbaz Sharif-i ashi.

## Armenia aser Azerbaijan tsüingta arütsü nung rarar

Yerevan, Monupii/May 12

(Agencies): Armenia aser Azerbaijan sepai tsüingta arütsü nung rara tenzükshigo, ta Armenia-i ashi. European Union-i anir linük ana tsüingta hopta tatemlen yijung ken o jembitsü aliba raksatsütsüsa kanga sashia rarar anogo ka lir ano iba osang ya angashir.

Azerbaijan nung Armenia nung aliba Nagorno-Karabakh region nung litsü-lika mechi Baku aser Yerevan tsüingta küm aika mangatetep nung arur aser rara ana raraogo.

Hokulbarnep Azerbaijan Armed Forces temi anüdoklen Stok tsütsü ceasefire nung aibelena UAVs amshi," ta Yerevan nung defence ministry ajanga sangdong ka nung ashi.

Armenian armed forces indang servicemen ana yiru aser ka takum kumzüktsü teimla kangabo mali, ta ashi.

Brehostibarnü arütsü nung raratepdang Azerbaijan serviceman ka asü aser Armenian sepai pezü yirua liasü.

European Council Tir Charles Michel-i anir jembishinütsü atema Armenia Ato Kilonser Nikol Pashinyan aser Azerbaijan Tir Ilham Aliyev na Deobarnü Brussels nung ajuruteptsü sentong lir.

Lenir ana yagi külemi June 1 nü Moldova nung European summit ka akatsü lia France

aser Germany lenirtem den ajuruteptsü molungogo, ta EU ajanga ashir.

Azerbaijan-i Brussels nung jembishinütsü aliba nung tetsükdaktsü lenmang bushir, ta Pashinyan-i Brehostibarnü aitsü. Iba senden nung Azerbaijan den yimjung tezüngzüktep ka züluteptsü teimla kanga ajema lir, ta pai tekumdangtsü shia liasü.

Draft agreement ka tang ang tetenzüker aser yangji meyongnem agütsütsü atema jembitsü kerara, ta Pashinyan-i ashi.

May ita tetenzüklen US Secretary of State Antony Blinken-i Azerbaijan aser Armenia foreign minister tem Washington nung jembishinü akatsü ajurutepdaktsüba sülen EU-i yangluba sentong ya arur.

Ukraine amakba mechi taoba mapang Soviet nung aliba linük ana tsüingta yimjung asoshi jembia aruba Russia-i temolung magütsü akumba sülen anüolen linüktem aiter.

Armenia ya akhi mapang nungi security tsütsü Russia dak metaloker arur aser parnok Moscow dang tali jashir.

Mangatetep aliba litsü-lika aser talisa Nagorno-Karabakh mechi linük ana tsüingta 2020 aser 1990s nung kanga sashia rara liasü. Iba mapang nisung meyrirjang ter dak tema asü.

## Sudan rara: Civilian tem kumzuka ayutsü molungtepogo



Sudan nung rara adoka aliba mechi refugee meyrirjang aika kidanger linük, Ethiopia nung nung jenoka lir. Sudan army aser paramilitary Rapid Support Forces (RSF) tsüingta tashi raktepa ita jungnüa rara arudang nisung aika takum samaogo.

Khartoum, Monupii/May 12

(Agencies): Hopta ka jungnüa jembishinüba sülen Sudan nung mangatetep adoka aliba telok ana tsüingta civilian tem timtemba jenjang nungi ajungkettsü asoshi tezüngzüktep ka yanglu, saka yimjung tsütsü terenlok kangabo mali.

Taolen makai aliba civilian tem asoshi ibai teyari mezüingbuba mera alitsü.

Parnoki raradak tesem yutsür aoba nüburtem nem timtem magütsütsü, teyari mapa inyaker kumzuka ayutsü aser 'human shields' ama civilian tem mamshitsü molungtep.

Ajisüaka parnoki rara anena atatsü memolung.

Sudan yimtiba, Khartoum nung Hokulbarnüa tayimtsü aser injang-bomb tulu amshia tali amakba osangtem lir.

Yimjung ken o ya US aser Saudi Arabia nati anir jembia arur. Teyari agütsür rakzükraaktemba aser amakba

sülen 'humanitarian assistance' kanga nüngdaka lir ta telok anaprongi ajitetogo aser teyari osettem timtem majurui agütsütsü asoshi süngjema alitsü imlar, ta US ketdangsur temi ashi.

Ajisüaka yimjung ken o tsütsü telok ana meta talang agi pilar lir, ta US-i ashi.

Ano mapa inyaktsü aika lir, ta Saudi Arabia-ia ashir. "Tang molungtepa aliba ama inyaktsü kanga tongtipang aser iba sülen danga mera agitsü," ta ashi.

Civilian nem yimsü südaktsütsü asoshi sentong aliba nung Sudan indang army nung dendaktsütsü asoshi paramilitary Rapid Support Forces (RSF) temi memolungba sülen April ita tiyonglen rara ya tenzük.

Iba sülen nisung asüba 600 dak tema kumogo aser ano meyrirjang aika pei ki yutsür tesem balalai jena aor, ta WHO ajanga ashir.

# Kohima nung State Level Inter High School Tournament temogo



Kohima nung Department of Youth Resources & Sports (YRS) Nagaland ajanga ayongzükba mezüngbuba State Level Inter High School Tournament (Badminton & Table Tennis) nung takok anurtem den Department ketdangsürtem külemi tangokba noksa nung angur.

**Kohima, Monupii/May 12 (TYO):** Department of Youth Resources & Sports (YRS) Nagaland ajanga Kohima nung ayongzükba mezüngbuba State Level Inter High School Tournament (Badminton & Table Tennis) tanü temogo.

Asaya tabu ana ya tetsür aser teburtem asoshi Indoor Stadium Kohima nung ayongzükba liasü, kong district ajak agi 11 - Dimapur, Kiphire, Kohima, Longleng, Mokokchung, Mon, Peren, Phek, Tuensang, Wokha aser Zunheboto nungi shilem agia liasü.

Iba asayamung ya Director of School Education, Wonthungo Tsopoe-i Brehostibarnü lapokja liasü.

**Category balala nung takok anguba yamai alitsü:**

## **BADMINTON:**

Girls Double: Mezüngbuba jenjang Longleng nungi Hone B Phom & Y Theila Phom; tanabuba jenjang Mokokchung

nungi Temenaro & Yalemjungla aser Joint third winners ya Dimapur nungi Heyisen Longkumer & Wangshirenla Imchen aser Tuensang nungi Narola S Chang & Benchongsenla alitsü.

## **Girls (Single):**

Mezüngbuba jenjang Longleng nungi Nancy Phom; tanabuba jenjang Kohima nungi Tanisha Gurung aser Joint third winners Zunheboto nungi Vinobo A Yeptho aser Mon nungi Anon W Konyak alitsü.

## **Boys (Single):**

Mezüngbuba jenjang Mon nungi Nokpong Konyak; tanabuba jenjang Kohima nungi Erenbemo Odyuo aser Joint third winners Tuensang nungi Moakumzuk aser Mokokchung nung Sentiyaatet Jamir alitsü.

## **Boys (Doubles):**

Mezüngbuba jenjang Peren nungi Kevicetlungbe & Kangzangngau; tanabuba jenjang Kohima nungi Ruvehu & Menguphrezzo Solo aser Joint

third winners Phek nungi Churho Kapfo & Mewete Nuh aser Longleng nungi Bongkam S Phom & Lemlung Phom alitsü.

## **TABLE TENNIS:**

### **Boys (Single):**

Mezüngbuba jenjang Dimapur nungi David Hinglak; tanabuba jenjang Kohima nungi Vilavotuo Linyü aser Joint third winners Mokokchung nungi Imtisupong aser Kohima nungi Rüdilhoulie Belho alitsü.

### **Girls (Single):**

Mezüngbuba jenjang Kohima nungi Kesinuo Dzüvichü; tanabuba jenjang Kohima nungi Vichaduonuo Rame aser Joint third winners Tuensang nungi Yimtisenla aser Kohima nungi Pekrusenuo Yiese alitsü.

### **Boys (Doubles):**

Mezüngbuba jenjang Peren nungi Moshasangli B & Namang Sangbou; tanabuba jenjang Kohima nungi Rüdilhoulie Belho & Vilavotuo; Joint third winners Dimapur

nungi Karthik Jain & Kihika Yeptho aser Zunheboto nungi Toinoto Z Assumi & Apuvi Z Ayemi alitsü.

### **Double (Girls):**

Mezüngbuba jenjang Kohima nungi Kesinuo Dzüvichü & Vichaduonuo Rame; tanabuba jenjang Tuensang nungi Sangmeitola & Yimtisenla aser Joint third winners Zunheboto nungi Litina A Achumi & Sumitoli Z Assumi aser Dimapur nungi Vinika Awomi & Grace Thejanuo Sekhose alitsü.

Iba asayamung tembangba sentong nung Commissioner & Secretary of YRS, Wezope Kenye ajanga takoker nem

senpet aser kulizüing kaket agüja liasü.

Pai iba sentong nung jembidang, shisaliok nung saisapong ya tongtipang shilem ka lir, koba temang atema kisüing masü saka teamwork, leadership aser perseverance ama life skills tongtipang adokdaksür, ta ashi.

"Saisapong ajanga asenoki yimya, temolung agütsüba aser meranga inyaksü angazüker, koba takum nung takok balala atema kasasa tongtipang lir," ta pai ashi.

Pai iba asayamung nung shilem agir ajak dang teamwork tongtipang südaksütsü ayongzük.

"Kija ama nenoki bendanga agütsüba aser yimya tajung nung asayabaji kanga nüngdaker, saka nenok külemi team ama inyakba ajanga tarutsü nung temaba jenjangi atutsü," ta Kenye-i ashi aser kaketshir dang maneni practice alitsü aser asayatsü ayongzükba liasü.

Iba tatembang sentong nung menden YRS Assistant Director, Nyuvitho Nyuthe liasü aser Deputy Director, Jakedovo Chase-i melepzüing o jembia liasü.

## **Nagaland Reading Festival... (Tapak 2 nungi...)**

Principal Director, School Education, Thavaseelan K, IAS ajanga ashiba agi, school tem nung Micro-Improvement Approach amshiba atema India nung state tem rongnung Nagaland ya temaba jenjang pongu nung lir.

Iba ya ajanga azüingba aser angazükba nung tashi itshidaksür aser DIKSHA project nunga yarir, ta pai ashi.

Iba benjong takok ngua ayongzükta ya district aser state nungi team balalai lungjemer meranga inyakba ajanga lir, ta pai ashi.

Iba benjong takok ngua litetba nung Mantra 4 Change aser Shikha Lokam tenteti tongti shilem agi, ta pai ashi.

NRF & National Kala Utsav nung takok angurtemji - EBRC, Wokha kübok Government Primary School, Orchid ajanga mezüngbuba jenjang ngutet, Tuensang district kübok Government Middle School, Longdang ajanga tanabuba aser Chumoukedima district kübok Government Middle School, Piphema Bazar ajanga tasembuba jenjang nguteta liasü.

## **St. Joseph University... (Tapak 2 nungi...)**

Iba kaket reju jenjang tajung tongtettsüsa temolung agüja aser bendanga agütsür inyakba atema pai SJU nung sendaktepa alir ajak dang pelaba lemsatepa liasü.

Pai graduate asürtem dang lokti ajungtsü asoshi shisatsü amshiba nung graduation certificate aliba ya khuret tulu lir, ta ashi.

University yutsür aoba sülen asangsang nung alima ajurudang education shidakbaji tenzüker. Anungji nenok renema alitsüla aser asen lokti timtemba

koktettsü asoshi temolung agüja inyaksüla, ta pai ashi.

Iba sentong nung Governor La Ganesan aser tongtipang nisungtemi graduate asür nisung 888 nem kulizüing kaket agütsü, Under Graduates kaketshir 16 nem gold medal agütsü, 16 nem silver medal agütsü, Post Graduate 15 nem gold aser 15 nem silver medal aser nisung ana nem Ph.D agüja liasü.

Iba sentong nung alakteta jaoker Group Head- Emerging Corporate Group HDFC Bank Ltd, Ravesh Bhatia liasü.

## **WFI tekolakba Brij Bhushan Sharan Singh-i kuli agütsüogo**



**New Delhi, Monupii/May 12 (Agencies):**

Wrestling Federation of India (WFI) tekolakba Brij Bhushan Singh-i tetsür kar dak tim masüba mapa inyak ta tai tonglokja aliba ken o nung kuli agütsüba maparen Hokulbarnü tezükogo.

Wrestler temi ashishiba nung ajemdaker Brij Bhushan-i pa mendena kuli agütsüogo aser ano kuli kaket kar agütsütsü shiogo. Arishi küm 66 tain Bhushan-i pa aitsübatem khenyongi magizüker.

Tetsür DCP ka kübok nisung ter aliba Special Investigation Team ka tetetogo, ta Delhi Police-i

Hokulbarnü ashi. SIT unit nung police ketdangsür trok lir aser yangji tetsür pezü dena lir.

Delhi Police ajanga benokba FIR nung aija alisang Assistant Secretary WFI Vinod Tomar indang statements-a agiogo.

Brij Bhushan dang jangjateptsü atema video kuli aser mobile data kar bener aotsü shiogo.

Wrestler temi ashishiba indang kuli bendentsü asoshi Delhi Police team tem Uttar Pradesh, Jharkhand, Karnataka aser Haryana state temi oa liasü. Bendang lima nungia tim masüba mapa inyakba tai tonglokja aliba atema Delhi

indang protection unit nungi ketdangsürtemi nüngdabapur den osang agiteper. Delhi Police-i Brij Bhushan tebu dena asüngdangyatsü ta ashi.

WFI tiri tim masüba mapa inyak ta tai tonglokja aliba tanüingba wrestler tem nungi statement bendentsü asoshi Code of Criminal Procedure's (CrPC) Section 164 kübok Delhi Police-i Rouse Avenue Court nem application agüja lir.

Longkak aita aliba wrestler temi hopta tetenzüklen WFI tir Brij Bhushan dang Lie Detector Narco Test agitsü ayongzükba liasü.

Tim masüba mapa inyak ta tai tongloktsüba nung ajemdaker taoba ita Delhi Police-i WFI tir anema FIR ana benoka liasü. Mezüngbuba FIR ya tanur kati tai tongloktsüba dak sendakba lir aser Protection of Children from Sexual Offences (POCSO) Act den Indian Penal Code indang tapet section kübok ken o benok.

Tanabuba FIR ya tain temi ashishiba nung ajemdaker bushisüngdangtsü atema lir.

## **BILEMDANGANG**

**"Nisung molungjang anguba takum ka asütsü merangang"**